

Die Berufswahl.

De Onkel Hans dud Hochzeit mache,
Werd in de Parrkerch heit getraut
Un's kläne Evche, des därf trage
Die Spitzeschleppe von de Braut.
Es hat in soine blonde Locke
En Kranz aus blaue Blietestern'
Un beim Hochzeitsmahl dud's hocke
Grad mitte unner junge Herrn.
Un die dun's kläne Evche necke,
Ob's dann nit a bald heiern will,
Ja do dud sich des Evche strecke,
Zu dere Frag' do schweigt's nit still.
"Ich will doch gornit Hochzeit feiern"
Sou dud sich's ganz energisch wehr'n,
"Nä, ich du ganz bstimmt nit heiern,
Dann ich will doch e Witfraa wer'n.

